

河南通志

河南通志

河南通志卷之五十六

名宦下

河南府

[漢]吳公上蔡人文帝時爲河南守治平稱天下第一詔
拜廷尉

尹翁歸字子况河東平陽人昭帝時爲緱氏尉歷守
郡中所居治理遷都內令

魏相字弱翁濟陰定陶人宣帝時爲河南太守禁止
姦邪豪強畏服會丞相車千秋死時千秋子爲雒陽
武庫令自見失父而相治郡嚴恐久獲罪乃自免去
霍光因責相謂見丞相不在而斥逐其子何淺薄也

遂以他事下相獄河南卒戍中都官者二三千人遮
大將軍自言願復留一年以贖太守罪河南老弱萬
餘人又守關欲入上書關吏以聞會赦出復有詔守
茂陵令

貢禹字少翁瑯琊人宣帝時爲河南令有善聲歲餘
以職事爲府官所責免冠禹曰冠一免安復可冠也
遂去官元帝卽位徵禹爲諫大夫

韋元成字少成魯國鄒人丞相賢之子元帝時爲河
南太守有治行數歲徵爲未央衛尉

王嘉字公仲平涇人成帝時爲河南太守治甚有聲

徵入爲大鴻臚

王崇瑯瑯臯虞人建平中爲河南太守以課最第一
徵爲御史大夫

陳遵字孟公杜陵人所到衣冠懷之唯恐在後時列
侯有與遵同姓字者每至人門曰陳孟公坐中莫不
震動旣至而非因號其人曰陳驚坐平帝時爲河南
太守以明敏稱嘗召善書吏十人于前治書謝京師
故人遵憑几口占書吏且省官事書數百封親疎各
有意河南大驚

周澤字稚都北海安邱人中元初爲滎池令奉公尅
已矜恤孤羸吏民歸愛之

劉興齊武王縯之子建武初爲緱氏令有明畧善聽

訟遷宏農太守

董宣字少平陳留人建武中爲洛陽令爲政嚴而不殘時湖陽公主蒼頭白日殺人因匿主家吏不能得及主出行而以奴驃乘宣於夏門亭候之乃駐車叩馬以刀畫地大言數主之失叱奴下車因格殺之主卽還宮訴帝帝令宣謝主不從強之宣兩手據地終不肯俯上因勅彊項令出賜錢三十萬宣悉以班諸吏由是搏擊豪強莫不震慄京師爲之歌曰枹鼓不鳴董少平

索盧放字君陽東郡人建武六年爲洛陽令政有能名以病乞身徙諫議大夫

祭彤字次孫潁陽侯遵子光武時爲僊師令使近
遵墳墓四時奉祀彤有姚零視事五年縣無盜賊課
第一

周紆字文通下邳徐人和帝時拜洛陽令下車問大
姓主名吏以里豪對紆厲聲怒曰本問貴戚豈欲知
此賣菜傭乎自是貴戚歛迹京師肅清

祝良字石卿長沙人順帝時爲洛陽令歲時大旱順
帝親爲祈雨良暴身階庭引咎自責日中雨降爲歌
曰天久不雨烝民失所天王自出祝令特苦精符感
應沛然下雨

三國王昶字文舒太原晉陽人魏黃初中爲洛陽典農

時都畿樹木成林昶斫祛荒萊勤勸百姓墾田特多
後遷兗州刺史

李勝字公昭廣漢雒人魏明帝時爲洛陽令累遷河
南尹前後所歷宰守俱稱職

晉楊佺期華陰人震之後咸康中爲河南太守時付堅
入寇佺期擊走之斬獲甚衆進龍驤將

辛恭靖隴西狄道人隆安中爲河南太守會姚興來
寇恭靖固守百餘日以無救而陷被執至長安興欲
脇以降恭靖罵賊不屈興怒幽之別室經三年恭靖
誑守者乃踰垣而遁歸於江東安帝嘉之擢諮議叅
軍

南北朝毛修之字敬文陽武人宋高祖時爲河南太守
戍洛陽修治城壘帝至案行善之賜衣服玩好擢爲
安西司馬

裴松之字世期河東聞喜人宋武帝北伐以松之爲
司州主簿轉中從事既尅洛陽松之居州行事帝後
遣毛德祖使洛陽因勅之曰松之廊廟之才不宜久
居邊務今召爲太子洗馬可令知之

甄琛字思伯中山無極人魏宣武間累遷河南尹時
多寇盜琛以里正職微任碎不能督察表請少高其
品選下品中應遷者進而爲之又奏以羽林爲遊軍
於諸坊巷司察盜賊於是京邑清靜後皆踵焉

元仲景延昌初爲河南尹奉法無私時吏部尙書樊子鵠部下縱橫又爲盜竊仲景密加收捕咸卽行決豪貴寒心累遷中軍大都督

高崇遼東人魏景明中除洛陽令詔許面陳所懷以故崇常得人奏是非朝貴斂手無敢干政

韋祐字法保京兆山北人魏孝昌間爲河南尹常與東魏戰流矢中頸從口中出久乃薤後加驃騎大將軍儀同三司會東魏遣使送糧饋宜陽祐潛邀之中矢卒於陣諡曰莊

隋樊子蓋字華宗廬江人大業間爲檢校河南內史車駕至高陽追詣行在所帝逆勞之曰昔高祖留蕭何

於關西光武委寇恂以河內公其人也進位光祿大夫

〔唐〕竇軌字士則岐州平陸人貞觀初爲洛州都督周洛間因隋亂人不土著軌下令諸縣有遊手末作者按之由是威信大行民皆趨本卒贈并州都督

賈敦頤曹州冤句人永徽中累遷洛州刺史時豪右占田多踰制敦頤舉沒者三千餘頃以賦貧民發姦擿伏下無能欺

賈敦實敦頤弟咸亨初爲洛陽長史政亦寬惠人心懷向洛陽令楊德幹矜酷烈杖殺人以立威敦實喻止曰政在養人傷生過多雖能不足貴也德幹爲衰

減始洛人爲敦頤刻碑大市旁及敦實入爲太子右庶子人復爲立碑其側故號曰棠棣碑

魏元忠宋州宋城人聖歷初爲洛州長史治號威明時張易之家奴暴橫元忠笞殺之權豪憚服遷隴右諸軍大使

張柬之襄陽人永昌初爲洛州司馬武后求才狄仁傑薦之他日又問仁傑曰臣嘗薦張柬之未用也遂擢爲司刑少卿

張仁愿華州下邳人神龍中以左屯衛大將軍兼檢校洛州長史會穀貴多盜仁愿一切捕殺積府門畿甸震懾無敢犯先是賈敦頤嘗爲長史有政績時

人爲之語曰洛有前賈後張敵京兆三王

崔隱甫貝州武城人開元初爲洛陽令梨園弟子胡
雛善笛有寵負罪匿禁中帝以他事召隱甫從容止
曰就卿丐此人對曰陛下輕臣而重樂工請解官再
拜出帝遽謝與胡雛隱甫殺之有詔貲死不及賜隱
甫百緡尋擢并州司馬

李傑相州滏陽人元宗時爲河南尹精聽斷雖行坐
飲食省治不少廢由是府無淹事吏民愛之有寡婦
愬其子不孝者物色非是謂婦曰子法當死無悔乎
答曰無悔傑乃命市棺還斂之使人迹婦出與一道
士語按得其姦乃殺道士內於棺而釋其子人以爲

快河汴之交舊有梁公埭久不治南方漕弗通傑發
丁夫修之不費而利入代宋璟爲御史大夫

李揆字端卿隴西人開元中爲河南尹時蕭炅倚權
植私揆裁其繆

韋陟字元甫萬年人開元中爲洛陽令宋璟見之歎
曰盛德遺範盡在是矣

裴寬絳州聞喜人開元中爲河南尹方正自持不屈
權貴豪右憚之河南大治

李尙隱萬年人元宗時累遷河南尹尙隱性剛亮論
議皆披心示誠處事分明御下不苛尤詳故實前後
制令誦記無遺妖賊劉定高夜犯通洛門尙隱坐不

素覺左遷桂州都督帝遣使勞之曰知卿公忠然國法須爾因賜雜彩百匹遣之

李朝隱字光國京兆三原人開元中擢河南尹政尙嚴清姦人憚栗時太子舅趙常之奴怙勢暴橫善良多受其害朝隱曰似此放恣不繩不可爲政執而榜辱之帝聞之深加慰勉入爲大理寺卿

張拯曲江人九齡子少有志行天寶末爲伊闕令有異蹟安祿山陷河洛欲得拯爲重遂遣人以官誘拯降拯曰吾文獻後也死則死耳豈肯受僞官耶後賊平擢太子贊善大夫

裴諤字士明寬之子天性恬淡坦易溫藹遇物不事

峻厲代宗時爲河南叅軍遷河南尹東都副留守以
寬厚爲治不鞠人以贓謂五世爲河南尹人皆榮之
顧少連字彝仲蘇州吳人德宗時補登封主簿邑有
虎害少連命塞陷穽移文嶽神虎竟不爲患徵爲監
察御史

崔從博陵安平人上元初爲河南尹政尙簡易蠲畧
細苛引伊水溉田人甚便之

鄭珣瑜字元伯滎澤人德宗時爲河南尹清靜惠下
賤歛貴發以便民時韓全義伐蔡河南王僞運珣瑜
密儲之陽翟以給官軍百姓不知僦運之勞凡迎送
敕使皆有常處吏密識其焉進退不數步差池珣瑜

性嚴重少言未嘗以私託人而人亦不敢譎以私焉
杜兼字處宏相州涇水人元和初擢河南尹善政及
民民甚懷之

皇甫湜字持正睦州新安人初授陸渾尉元和中裴
度爲東都留守辟爲判官多所匡輔

李紳字公垂亳州譙人元和間累遷河南尹河南多
惡少或危帽散衣擎大毬尸官道軍馬不敢前紳治
尙剛嚴皆望風遁云

馬宿字拱之婺州東陽人長慶間拜河南尹洛苑使
姚文壽縱部曲奪民田匿於軍吏不敢捕府大集部
曲輒與文壽偕來宿掩殺榜殺之